



साःगु भिंगु मरिचरिया नितिं लुमंका दिसै !

लक्ष्मण जमाल /चिलिमि'
प्रोप्राइटर

लाखा छै
LAKHA CHHEN

सोहखुटे, वडा नं. १६, येँ, फोन नं.: ४५६०७५८

येँ मनपां राप्रपायात जरिवाना यायेगु निर्णय प्रमयात ज्ञानेन्द्र शाहीया गम्भीर द्वपं

• लहना संवाददाता

लहनावाःपौ/येँमहानगरपालिकां राष्ट्रिय प्रजातन्त्र पार्टीयात १ लाख तका जरिवाना यायेगु निर्णय याःगु दु । महीग राप्रपां पुलांम्ह जुजु ज्ञानेन्द्र शाहया लसकुस यायेगु इवल्य फोहोर जूगु धासें येँ महानगरपालिकां १ लाख तका जरिवाना पुइकेगु निर्णय याःगु खः ।

येँ महानगरपालिकाया नगर प्रहरी निरीक्षक लिलाराज गाछामगरं जारी याःगु सुचल्य धयातःगु दु, 'न्त्यथनागु विषयसं मिति २०८१ फागुन २५ गते राप्रपा पार्टी कार्यालयपाखे ग्वसाः ग्वःगु ज्याइवल्य ब्वति काःपिं व्यक्तिपाखे एयरपोर्ट, तिलगंगा गौशाला लगायत सार्वजनिक क्षेत्रया सतक, सतकपेटी व आइल्याण्ड व अन पिनातःगु सिमाया लिसे रेलिङ्ग भौतिक क्षति व लाथेपाथे फोहोर तर्क यानाः वातावरण प्रदुषण याःगुलिं छिकपित फोहोरमैला व्यवस्थापन ऐन, २०६८, येँ महानगरपालिका वातावरण तथा प्राकृतिक स्रोत संरक्षण ऐन, २०७७ व येँ महानगरपालिकाया आर्थिक ऐन, २०८१ कथं १ लाख तका जरिवाना



यानागु ब्यहोरा निर्देशनानुसार इनाप याना ।'

थ्वहे इवल्य राप्रपां धाःसा येँ महागरपालिकां याःगु जरिवाना मपूलेगु खँ धाःगु दु ।

पार्टीया प्रवक्ता मोहन श्रेष्ठ

येँ महानगर १ लाख तका जरिवाना यायेगु निर्णय याःसां न थःपिसं उगु ध्यबा मपूलेगु धासें येँ महानगरपालिकाया मेयर बालेन साह राप्रपा व राजसंस्था प्रति वक्रदृष्टि तःगु द्वपं बिउगु दु ।

व्यक्लं वंगु आइतवाः जूगु लसकुस

ज्याइवल्य पार्टी अध्यक्ष राजेन्द्र लिङ्देन सहित पार्टीया कार्यकर्ता ब्वति काःगु खःसां न अन राप्रपाया ध्वाँय मडुगु खँ धयादीगु दु ।

प्रवक्ता श्रेष्ठ थःपिसं जरिवाना मपूलेगु धाःसां राप्रपाया संसदीय दलया

प्रमुख सचेतक ज्ञानेन्द्र शाही सोमवाः महानगरपालिकायात छू लखया जरिवाना बापतया ध्यबा पुलाब्यूगु दु । शाही महानगरप्रहरीया पुचःयात नाप लानाः जरिवाना पूगु श्रोतं धाःगु दु ।

थ्व स्वयां न्हयः एमाले दलबागु मार्गय ग्वसाः ग्वःगु ज्याइवल्य नं येँ महानगरपालिकां जरिवाना यायेगु निर्णय याःगु खःसा एमाले नं उगु जरिवाना पुलेत अस्वीकार याःगु खः । उगु इलय एमाले व मेयर साह दथुइ छू कथं वाक्युद्ध हे जूगु खः ।

थ्वहे इवल्य राप्रपाया सचेतक ज्ञानेन्द्र शाही पुलांम्ह जुजु ज्ञानेन्द्र शाहयात विमानस्थलय लसकुस यायेगु इवल्य भारत उत्तर प्रदेशया मुख्यमन्त्री योगी आदित्यनाथया किपाः सहितया ब्यानरयात कयाः गम्भीर द्वपं बियादीगु दु ।

ज्ञानेन्द्र शाही सामाजिक सञ्जालपाखे प्रधानमन्त्री केपी शर्मा ओलीया निर्देशनय व्यूकःया प्रमुख सल्लाहकार विष्णु रिमाल आदित्यनाथया किपाः तःगु लूगु धासें सांसद साही फेसबुकय पोस्ट याःगु दु ।

ल्यं ७ पेजय

बोधिचर्या हना समाजसेवा रत्न मोतिशान्ति शाक्ययात लःल्हात



लहना वाःपौ/वंगु नीन्यादै न्ह्यवनिसे समाजसेवाय निरन्तर क्रियाशील समाजसेवा रत्न मोतिशान्ति शाक्ययात थुगु दैया बोधिचर्या सम्मान लःल्हाःगु दु ।

११५ क्वःगु अन्तर्राष्ट्रिय नारी दिवसया लसताय बोधिचर्या लःल्हाःगु खः । ज्याइवल्य समाजसेवी शाक्ययात बोधिचर्या नेपालया अध्यक्ष अनिल शाक्य

स्वामाः क्वखायेका, यल महानगरपालिका- २१ यावडाअध्यक्ष रविन्द्र महर्जन दोसल्ला न्ययेकाः व वाम्पती प्रदेशया सामाजिक विकास मन्त्री हरिप्रभा श्रेष्ठ खड्गी सम्मानपत्र लःल्हाःगु खः ।

विशेषतः अपांगता जूपिं मस्तयगु स्वास्थ्य सेवा, शिक्षा, ज्येष्ठ नागरिक सम्बन्धी थीथी ज्याइवः व निःशुल्क स्वास्थ्य शिविर

ल्यं ७ पेजय





नेवा: राष्ट्रिय म्ये

चमि : दुर्गालाल श्रेष्ठ लय चिनामि : तिर्थ माली

धुन देने धुन सँन्त्यलं भी फुक्कं हे छम्ह जुइ धुन
भीगु लागाय् भी स्वयं हे जः जुया धुन लुइ धुन
ह्यांगु भुमिइ अष्टमण्डल ह्यांगु चाः दुने थी नगु
भीगु नेवाः ध्वाँय् थ्व हे खः ज्यान भी सकस्यां छगू
जातितय् स्वायत्त राज्यं लुइ कपं च्वय् भिलिमिलिं
राष्ट्र भःभः धाय्क न्ह्याके भीगु चःतिं भीगु हिं

सम्पादकीय



बालेनया बालहठ

यँ महानगरपालिकाया मेयर बालेन्द्र साहया कारणं यानाः कर्मचारीतय्सं तलब नये खनाच्चंगु महु। मेयर साहं यँ महानगरपालिकाया प्रमुख प्रशासकीय अधिकृत सरोज गुरागाईयात कारबाही यायेवं कर्मचारीया तलब नये मखनाच्चंगु खः। यँया पुलांगु बसपार्कय् दयेकाच्चंगु काठमाडौं टावरया थप जूगु नक्सा पास याःगु द्वपं प्रमुख प्रशासकीय अधिकृत गुरागाईया बीगुया लिसे छानबिन समिति नीस्वंगु खः। उगु छानबिन समितिं छानबिनया ज्या क्वमचाःगु धासँ छुं ई प्वंगु खः। तर मेयर साहं छानबिन समितियात थप ई बीगु ज्या मयात। थुनिया दथुइ मेयर साहं यँ महानगरय् प्रमुख प्रशासकीय अधिकृत छ्वयाहयेत सामान्य प्रशासन मन्त्रालय इनाप यात। तर मन्त्रालयं दुम्ह प्रमुख प्रशासकीय अधिकृतयात ज्या मयाकू धासँ तत्काल मेम्ह प्रमुख प्रशासकीय अधिकृत छ्वये मफइगु जानकारी यँ महानगरपालिकायात याकूगु खः।

वयां लिपा मेयर साहं प्रधानमन्त्री केपी शर्मा ओलीया कारणं मन्त्रालयं प्रमुख प्रशासकीय अधिकृत छ्वया महःधासँ सामाजिक सञ्जालय् थीथी द्वपं बियाः पोस्ट यायेगु ज्या जुल। गुकिया लिच्चः कथं यँ महानगरपालिकाया उपमेयर सुनिता डंगोलं मेयर साहया खँयात कयाः असन्तुष्टि प्वकेगु ज्या जुल। थुनिया दथुइ सामान्य प्रशासन मन्त्रालयं प्रमुख प्रशासकीय अधिकृत गुरागाईयात याःगु छानबिन प्रतिवेदन मन्त्रालय छ्वयाहयेत निर्देशन बिल। तर मेयर साहं उगु छानबिन प्रतिवेदन तकं मन्त्रालय छ्वयेगु आवश्यकता मतायेकसँ सामाजिक सञ्जालय् थःपिनिगु धापू तयेगु ज्या यानाच्चंगु दु।

यँ महानगरपालिकाया मेयर छम्ह जिम्मेवार व्यक्ति खः। तर मेयर साहं क्यनाच्चंगु बचकना धाःसा अजू चायापुक जुयाच्चंगु दु। मेयर साहं थः छम्ह बाहेक मेपितं ल्याः तकं मतयेगु ज्या थ्व स्वयां न्हयः नं जुयाच्चंगु दु। मेयर साहया थज्याःगु बचकनां अन्ततः घाटा स्वइतं जुइगु खःसा यँ महानगरपालिकायात हे जुइ। पदय् च्वनेधुंकाः थःगु पदीय दायित्व थुइकेमाः। जब थःगु पदीय मर्यादायात हे थुइकेगु ज्या जुइ मखु अज्याःगु इलय् पदया गरिमा नं दइ मखु। अथेजुयाः आः वयाः मेयर साहया दायित्व धइगु थःगु पदीय गरिमायात थुइकेगु खः व उकियात पालना यायेगु खः। थःगु पदीय दायित्व थुइके मफइगु अवस्थाय् मेयर जुयाच्चनेगु धइगु यँ महानगरपालिकायात ध्वस्त यायेगु ज्या जुइ।

थम्हं यायेमाःगु ज्या मयायेगु अले केन्द्रीय सरकारं व मयाः थ्व मयाः धकाः धायेगु उचित खँ जुइ मखु। थम्हं ज्या नं मयाइगु अले मेपितं दोष बीगु पाय्छि जुइ मखु। संघीय सरकारं धायेधुंकूगु दु। मेयर साहं कारबाही यानातम्ह प्रमुख प्रशासकीय अधिकृतया बारे यँ महानगरपालिकां निर्णय मयाःतले मेम्ह कार्यकारी प्रमुख छ्वयेगु जुइ मखु। अथे जुयाः तत्काल प्रमुख प्रशासकीय अधिकृत गुरागाईं बारे जूगु छानबिन प्रतिवेदन तत्काल सार्वजनिक यायेगु दायित्व मेयर साहया खः। थ्व खँय् ध्यान बियाः याकनं प्रतिवेदन सार्वजनिक यात धाःसा थुकिं संघीय सरकार नाप ल्वानाच्चनेमाःगु अवस्था वइ मखु। तर थःगु बचकना हे जक क्यनेगु खःसा मेता खँ जुल।

गायक कुमा सागर व भाषिक मानवाधिकार-२



गणेश राई

घटना-३ मधेसीया अपमान

खँ २०७७ सालया खः। प्रदेश-२ सरकारं थीथी टेलिभिजन च्यानलय् प्रसारण जुइगु स्वंगू ज्याइवः ‘कोरोना ल्वःमंकेगु गफगाफ’, ‘ह्वाट्स द फ्लप’ व ‘जोगिन्दर बोले प्रणामजी’ निर्माण व प्रसारण बन्द यायेमाः धासँ संघीय सञ्चार मन्त्रालययात पौ च्वःगु खः। ‘थ्व स्वंगू टेलिभिजन ज्याइवः सहित छू नेपाली संकिपालय् सीमित व्यक्तिया न्हयइपुइकेगु निरतिं लिसे मनोरञ्जनया निरतिं गुगुं खास वर्ग, समुदाय (मधेसी) यात शब्द, अभिनय व संकेतमार्फत् क्वह्यंकेगु, अपमान यायेगु, बेइज्जत यायेगु ज्या जुयाच्चंगु दु। थज्याःगु ज्यां राष्ट्रिय एकता व सामाजिक सदभावय् लिच्चः लाकेफु।’ पतिइ धयातःगु दु। उक्तथं आलोचनाया दथुइ छुं कलाकारं ‘नमस्ते ढोग दियाँ’ म्ये दयेकेगु ज्या याःगु दु। अज्याःगु म्येया शब्दं सांस्कृतिक महत्व कुबी मखु।

संसारया भाषा

इन्थोलोक (२०२४) सँ संसारय् ७ हजार १६४ भाषा ल्हाइ। ४० प्रतिशत भाषाया वक्ता ल्याः १ हजार स्वयां म्हो दु। ७० प्रतिशत भाषा आदिवासीं ल्हाइगु भाय् खः। संयुक्त राष्ट्रसंघं सन् २०२२ निसे २०३२ यात अन्तर्राष्ट्रिय आदिवासी भाषा दशक घोषणा याःगु दु। नेपालय् ल्हाइगु १२४ गू भाषा मध्ये ९३ गू (७५%) भाषा आदिवासीतय्सं ल्हाइगु भाय् खः। भाय् विचार विनिमयया साधन जक मखुसे, संस्कृतिया वाहक, ज्ञान व सभ्यताया खानी नं खः। संरक्षण, संवर्धन यायेगु सरकारया दायित्व जूगुलिं माःगु नीति नियम दयेकाः कार्यान्वयन यायेगु खँ प्रतिवेदनय् न्हयथनातःगु दु।

भाषिक मानव अधिकार

इतिहासकार बाबुराम आचार्य ‘वर्तमान राष्ट्रभाषा नेपाली आः स्वयां छुं दशक न्हयः तक ‘पर्वते-बोली’ व व स्वयां न्हयः ‘खश-कुरा’ या नामं प्रसिद्ध जुयाच्चंगु खः। सल्यान व प्यूठानया दथुइ लाःगु ‘सिखिको-लेक’ स्वयां पारि पाखे वःपिं खश-वर्गया आर्यत आबाद जुयाः भिन्न्यागूगु शताब्दीया अन्त्य पाखे कालीगण्डकी खुसि सिथय् ‘पर्वत’ नांया छगू न्हूगु राज्य नीस्वनेधुंकाः जक स्थानीय मगर, गुरुङ, थकाली आदि मेपिं आग्नेयदेशी-वर्गया भाषा-परिवारया खँ ल्हाइपिं नागरिकत लिसे स्वापू वा सहवासं याना उगु इलय् ‘खश-कुरा’ य् पर्याप्त परिष्कार जुयाः थुगु भाषा ‘पर्वते-भाषा’या रूप ग्रहण याःगु खनेदुगुलिं उगु इलय् ल्हाइगु भाय् वा ल्हाइगु भाय्या नां ‘पर्वते-भाषा’ जुइगु सहज लिसे सार्थक नं दुगु खः। तर



वर्तमान नेपाःया संविधान (२०७२) या

प्रस्तावनाय् हे ‘नेपाः छगू बहुभाषिक देय् खः’

धकाः बहुभाषिकतायात आत्मसाथ यानातःगु

दु। संविधानय् यानातःगु व्यवस्थां ‘नेपालय्

व्ववाइगु फुक्कं मातृभाषा राष्ट्रभाषा खः’ धइगु

व्यवस्था यानातःगु दु।

आः थुगु भासं थःके दुगु प्रचार व प्रसार नं जुइगु विशिष्ट गुण व मिठासं यानाः नेपाल-अधिराज्यया राष्ट्रभाषाया रूप ग्रहण यायेधुंकूगुलिं आः थुगु भाय्यात ‘खश-भाषा’ वा ‘पर्वते-बोली’ धायेगु पाय्छि मजू। जुजु पृथ्वीनारायण शाहं ‘चार-वर्ण छतीस-जातया मंकाः क्यब’ दयेकेगु लिसे नेपाःया राष्ट्रभाषाया आकार काःगु खः। (हाम्रो राष्ट्रभाषा नेपाली, २०७०ः१२)। थ्व अबलय्या खँ जुल।

संविधानतः भाषाया आधारय् सुयातं विभेद याये मदइगु व्यवस्था तकं यानातःगु दु। धारा (३२) सँ ‘प्रत्येक व्यक्ति व समुदाययात थःगु भाय् छ लयेगु हक दइगु’ खँ न्हयथनातःगु दु।

वर्तमान नेपाःया संविधान (२०७२) या प्रस्तावनाय् हे ‘नेपाः छगू बहुभाषिक देय् खः’ धकाः बहुभाषिकतायात आत्मसाथ यानातःगु दु। उक्तथं हे (क) देवनागरी लिपिइ च्वइगु नेपाली भाषा नेपाःया सरकारी ज्याखँया भाय् जुइ धयातःगु दु। भाषा सम्बन्धी मेगु खँ भाषा आयोगया सिफारिसय् नेपाल सरकारं निर्णय याःकथं जुइ धयातःगु दु। संविधानतः भाषाया आधारय् सुयातं विभेद याये मदइगु व्यवस्था तकं यानातःगु दु। धारा (३२) सँ ‘प्रत्येक व्यक्ति व समुदाययात थःगु भाय् छलयेगु हक

दइगु’ खँ न्हयथनातःगु दु।

भीगु निरतिं कुमा सागर थेंज्याःपिं मातृभाषी गायक, गायिका, संगीतकारत माः। गुम्हेस्या भीगु लोक भजन हाली। लोकबाजाया प्रवर्द्धन याइ। लोकसंस्कृति, लोकसंगीतयात पुस्तान्तरण याना वयाच्चीपिं ज्याथापिनिगु प्रेरणा कयाः युवा पुस्ता दथुइ लोकप्रिय जुयाच्चीपिं पुस्ता सुं छम्ह तुक्केदार कमेडियनतय्सं हेबाय् चबाय् याइपिं पात्र मजुइमा। सुयां मजाक पात्र मजुइमा। सुं नं गायक, संगीतकारं थःगु लोकपरम्परा, लोकसंस्कृति, लोकबाजा, लोकजीवनया संवाहक जु इमाः।

पहाडं मधेसया सम्मान, पूर्व पश्चिमया समृद्धि, पश्चिमं पूर्वया मान यायेमाः। सुं नं व्यक्ति न्ह्यागु समुदायय् बूसां नं, व उगु हे समुदायया प्रतिनिधित्व याइ। अथेजुयाः वयागु भाषिक लवजयात अबुभ्र, अज्ञानताया संज्ञा बीमजिउ। व सुयातं अपमान यात धाःसा भाषिक मानव अधिकारया संरक्षण यायेत न्यायालय वनेमाःगु परिस्थिति वयेके बी मजिउ। थुखेपाखे १४२ जातजातिया हरेक नागरिक समुदायय् प्रतिनिधित्व सदभाव ल्यंकेगु खँय् सजग जुइमाः। गुकिं यानाः ‘भीगु मां भाय्या अपमान आः भीसं सह यायेगु जुइ मखु’ धकाः न्हयथनातःगु ब्यानर ज्वनाः सतकनिसँ प्रशासन ज्याकुथि न्हयःने प्रदर्शन याये म्वालेमा।

उमंग व यौवनया उत्सव खः - होलि



जीतेन्द्र विलास बज्राचार्य

नेपालय् हे न्हापांगु
रुवाःपाः प्याखं हरि
सिद्धि दःया प्याखं
होलि पुन्हि कुन्हु
ल्हुइकी । हरिसिद्धि
भवानी भारतया
उज्जैन मंहाकाल
पीठ साधना यानाः
हरिसिद्धि भवानी
येँया ज्ञानेश्वरय्
नीलतारा थापना
यानाः हरिसिद्धि
प्याखं ल्हुइकल ।
श्यंमश्यं १३०० दै
न्हयः हरिसिद्धिइ
ल्हययाः प्याखं
हुइकेगु चलन
न्हयात ।

चिल्लाथ्व पुन्हि, फागु पुन्हि,
चकं पुन्हि नेवाःतय्सं छुं छुं थःगु पहलं
हनीसा छुं पूर्व भारतपाखें प्रभावित
जुयाः हना वयाच्चंगु दु ।

‘होलि पुन्हि’ फाल्गुण शुक्लपक्ष
पुन्हि चिल्लाथ्व पुन्हि शिशिर ऋतुया
अन्तिम दिन व वसन्त ऋतु सुरु जुइगु
न्हिं खः । थ्वयात उत्सव उल्लासया
पर्वकथं हनीगु खः । थ्व सुथय् पुन्हि
दुसा जक हनी, बहनि पुन्हि क्यन
धाःसा हनि मखु ।

थीथी पुराणत नारद पुराण, भविष्य
पुराणय् नं होलिया ब्याख्या यानातःगु दु ।
हिरण्य कश्यपुं वया काय् प्रल्हादं विष्णु
भगवान जक नां काःगुलिं प्रल्हादयात
स्याय्त होलिकायात प्रल्हाद मुलय्
तयाः सिंपय् तयाः च्याकूबलय् होलिका
च्यात, तर प्रल्हादयात मिं मथ्यगु खः ।
अननिसे अबीर जात्रा यानाः थुगु पर्व
शुरु जुल धाइ ।

बौद्धधर्म ग्रन्थय् ‘होलि पुन्हि’यात
मूर्खतय्गु पर्व धयातःगु दु । थ्व कारणं
२५०० दै न्हयः हे होलि व्यापक कथं
न्हयाये धुंकल । इसापूर्व ३०० दै न्हापा
भारतया विद्याञ्चल क्षेत्रया रामगढया
अभिलेखय् नं ‘होलि’ खँवः च्वयातःगु
दु । महाद्यवं कामदेवयात भस्म याःगु
प्रतीक कथं चीर दहन भस्म याःगु
धकाः नं च्वयातःगु दु ।

ख्वपय् भूपतीन्द्र मल्लया
शिलालेखय् नं होलि उल्लासपूर्वकं हन
धइगु च्वयातःगु दु ।

होलि पुन्हि कुन्हु सिद्धार्थ गौतमं
बुद्धत्व प्राप्त यानाः दकलय् न्हापां थःगु
जन्म जुगु थाय् कपिलवस्तुइ भिक्षाटन
याना बिज्याःगु दिंकथं नं हनेगु याइ ।

होलि चिलाथ्व अष्टमि कुन्हु
वसन्तपुरय् स्वतः जाःगु छत्र थें च्वंगु
पंया चीर थीथी रंगिचक्री कापः खायाः
धंकल कि होलि सुरु जुइ । चीर धाःगु
वस्त्र खः, व नं मिसापिनिगु वसः, थ्वयात
लाज (इज्जत) नं धाइ । भीथाय् आः
नं लाज इज्जत काल कि चीरहरण यात
धाय्गु नं याः । चीर मेमेगु थासय् नं
स्वाइ । हनुमानध्वाकाया न्हयःने, यलय्
कृष्ण देगःया न्हयःने व मेमेगु थासय्
चीर स्वाय्गु चलन दु । थन कचा यक्व
दुगु वसिमा, आरुबरखराया मा, धचा
पासिमाय् रङ्गीविरङ्गी कापः खाया चीर
स्वाइ ।

कृष्णयागु थीथी लिला मध्ये
राशलीला यमुना खुसिइ गोपिनी पिनीगु
वस्त्र म्वःल्हुया च्वंबलय् वस्त्र कयाः
कदमया सिमाय् खायाः लाजया पाठ



स्यगुंया प्रतीककथं कापः खाइगु खः ।
ख्वपया भिंद्यःया देगलय् मिजंया
प्रतीक सिँवःयात लिङ्ग व ह्याउँगु
कापःयात मिसातय्गु चिं योनीकथं
खायाः च्यान्हुतक ल्वाकी । थ्व
खासांनिसे होलि सुरु जुइ ।

होलि खास यानाः उमंग व
यौवनया उत्सव जूगुलिं वैशं जाया
वःपिं मिजं, मिसापिनिगु दथुइ म्हितीगु
पर्व खःसां मचानिसे बुराबुरीतक
नं म्हितूगु खनेदु । पुचः पुचः मुनाः
म्हितीगु, पुचः मुनाः चाःहिलाः न्हापा
लोला अर्थात भौँ (मैन) फुलयु यानाः
थ्वया दुने अबीर, सितारा व जरि तयाः
कय्कीगु खःसा आः वयाः बेलुन,
प्लाष्टिकया भोलाय् लः तयाः कय्
कीगु याइ ।

न्हापा न्हापा थथः जक रंग इकाः
म्हितीगु होलि छु दै न्हयः वयाः जबर
जस्ती रंग इकेगु, हाकः पाकेगु, लखं
छ्वाकेगु, लागु पदार्थ नयाः वा त्वनाः
होलियात हे बदनाम याःगुलिं थजाःगु
ज्याखँयात सरकारं कडा निगरानी व
कारवाही याःगुलिं थौंकन्हय् होलिइ
थजाःगु ज्या म्हो जुया वनाच्चंगु दु ।

लिच्छवीकालनिसे होलि पुन्हि
कुन्हु चाँगुनारायणय् राधाकृष्ण व
रुक्मणीया खः जात्रा यानाः त्वाःत्वालय्
चाःहिकी । खः ज्वनावःपित अबीर छ्
वाकाः होलि म्हितीगु चलन दु ।

नेपालय् हे न्हापांगु ख्वाःपाः
प्याखं हरिसिद्धि दःया प्याखं होलि
पुन्हि कुन्हु ल्हुइकी । हरिसिद्धि भवानी
भारतया उज्जैन मंहाकाल पीठ साधना

यानाः हरिसिद्धि भवानी येँया ज्ञानेश्वरय्
नीलतारा थापना यानाः हरिसिद्धि प्याखं
ल्हुइकल । थ्यंमथ्यं १३०० दै न्हयः
हरिसिद्धिइ ल्हययाः प्याखं हुइकेगु चलन
न्हयात । लिपा बन्द जुयाच्चंगु ३५० दै
न्हयः मल्लकालय् हाकन न्हयाकल ।
यलय् स्वनिम्ह च्वंम्ह योगेन्द्रनन्द
राजोपाध्याय गयजुजु तान्त्रिक विद्याकथं
प्याखं ल्हुइकेगु चलन जुल । थ्व
प्याखनय् बालि व सुग्रीव ल्वापु,
रामायणया भाव नं प्याखं ल्हुइकी ।

थेंबहीया तःधंम्ह बज्जाः सिंह
सार्थबाहु रत्नाकर व्यापार यानाः
राक्षसपिं पाखें बचय् जुयावःगु दिं
होलि पुन्हिया कन्हय् कुन्हु अबीर छ्
वाकाः जात्रा यानाः देय् चाःहिकाः
विक्रमाशिला महाविहार सिंह कल्पनगर
भगवान बहालय् हइ ।

होलि पुन्हि कुन्हु मू चुकय् तयाः
विधिपूर्वक पुज्याइ, चान्हय् फल्चाय्
तया तइ । पारु कुन्हु थेंबही, ज्याथा,
असं, वघः, वतु, हनुमानध्वाका, कुमारी
छैं क्वय्, मरु भुतिसतः जुयाः प्याफः,
यतखा, त्यंगः, थायमदु, थेंहिति जुयाः
थाय्थासय् पुजा फयाः थेंबहिली लिहां
बिज्याकी । न्यतनिसें इतुंबहाल तक व
वंधलं वतु चिधंबाहा तक वनीबलय्
बाजं थाइमखु । इतुंबहालय् ससःकिजा
केशचन्द्र छु यानाच्चन धकाः सुनां
मसीक स्वः वंगु धाइ । थ्व दःया
ख्वाःपाः प्रशन्न मुद्रा जूगुलिं चकंद्यः
धाःगु धाइ ।

इतुंबहालय् फागु पुन्हिया चान्हय्
गुरुमापायात तिनिख्यःया याकः

सिमाय् वनाः छमुरी जाकि व छम्ह
मेय्या ला तयाः जा तःवनेगु चलन
दु । केशचन्द्रया तता सिंहसार्थबाहुया
जहान खः । थः जू जक म्हितेमाःगुलिं
सम्पत्ति दक्व फुत । तताया थाय् जा नः
वंबलय् लुँया भुइ तयाः जा नकुबलय्
भु खुया हल । अथे हे वयागु केयागु भु
नं खुया यंकुगुलिं बैं इलाः बैय् हे जा
तयाब्यगुलिं तसकं अपमान ताय्काः
जा रुमालय् तुं प्वःचिनाः जंगल वन ।
व हे जासां नय्माल धकाः स्वःबलय्
जा पाउँसे बास वल, अले पानाः नय्
माली धकाः जा पात । पानातःगु जा
बखुंतसें नयाबिल ।

केशचन्द्र दंबलय् जा मखंगुलिं
ह्वाँय्ह्वाँय् ख्वल । ख्वःगु स्वय्
मफयाः बखुंतसें लुँ खि फाना थकल ।
थ्व लुँ ज्वनाः वय् मफयाः छम्ह राक्षस
गुरुमापायात पाजु दय्काः क्वबिका
हल । गुरुमापा राक्षस जूगुलिं मन्या ला
मनःसें मगाः । वयात मचा कावा मधाय्
कं नय् दइमखु धकाः वाचा याकातल ।
लिपा खुयाः नया हःगुलिं गुमापायायात
तिनिख्यलय् यंकाः विशेषकथं वाचा
ल्हाकाः होलिया चान्हय् जा तःवनेगु
चलन न्हयाकल ।

थीथी थासय् थीथी कथं
न्हयइपुकाः धार्मिक आस्था विश्वास
तयाः होलि पुन्हि हनेगु याइ । श्रीपञ्चमी
निसें मञ्जुश्रीया पूजा याःसां होलिनिसें
होलिया म्ये हालाः त्वाःत्वालय्
थःथितिपिं मुनाः ससु पूजा न्याय्की ।
थ्व पाहां चःहे तक ससुपूजा न्याय्कीगु
चलन दु ।

राम प्रजापति
प्रकाशक

हारती मिठाई भण्डार
(इच्छा शाकाहारी)

कानिमाटी चोक, टंकेश्वर मार्ग, काठमाडौं ।
फोन नं. : ०१-५३७२९९९, मो. ९८०३९८०६९९

यहाँ:-विवाह, व्रतबन्ध, पाटी, पिकनिक, तथा अन्य शुभ कार्यको लागि अर्डर अनुसार मिठाईहरू तयार गरिन्छ ।

आयो नून खाउँ स्वस्थ रहौ

आयो नून खाउँ आयो नून खाउँ आयो नून खाउँ

आयो नून खाउँ आयो नून खाउँ आयो नून खाउँ

आयो नून खाउँ आयो नून खाउँ आयो नून खाउँ

आयो नून खाउँ आयो नून खाउँ आयो नून खाउँ

लक्ष्मी

२०८१ फागुन २७ मंगलवाः





होलिया चीर स्वायेगु ज्या

किपा : सुजल बज्राचार्य

नारी दिवस



मोतिशान्ति शाक्य
चाकुपाट, यल ।

नारी दिवसया छगू ज्याइवल्य थःत मूक्ता कथं सःता तःगुलिं न्ववायेत ताउत तक हे कम्युटरय सनाच्चगुलिं थौं रवि दने भचा लिबात । सुथसिया ९ बजे हे ज्याइवल्य थ्यंकेमाःगु । याकनं बेड टी हयेत कलाःम्हेसित ज्या ब्वल ।

भचा जायेकाः कलाःम्हेस्यां च्या ज्वनाः कुहां वल । रविं च्या म्हुतिइ तयसाथं ख्वाउँसे च्वंगु च्या नं जितः हयेगु ला धकाः तमं च्याया कप वांछ वयाबिल । अले 'मायाचा ग्वले ? धकाः तसलं न्यन । कलाःम्हेस्यां 'थौं नारी दिवस जूगुलिं जिं हे वयेम्वाल धया छ्वयागु' धकाः लिसः बल ।

'गपायसकं जान्नेम्ह छ, नारी दिवस धैगु ह्याउँ स्यूम्ह ला वाउँ स्यूम्ह ला, गन वनेमाःम्ह धकाः' कलाःम्हेसित हानं छल्यु हक्कल ।

रविं लँ फीत दराजं कमिज

लिकात । कमिज ला काचाकुचु जुयाच्चन । काचाकुचु जूगु कमिजं कलाःया ख्वालय् कयेकाः कमिजय् इस्त्रि छकः तकं हे तयेमलाः का छं धकाः जागय् जुल ।

कलाम्हं इस्त्रि यानाः कमिज बीहल । कमिज काकां 'भम्चा मय्जु ग्वले ? थौं ला कलेजय् ब्वंकः वनेम्वः' धकाः रविं न्यन ।

'छगू प्रोग्रामय् मवसे मज्यू धकाः पिहां वनेत लं पिनाच्चन' रविं थ्या कलातं लिसः बिल ।



'विदाया दिन छन्हु नं छैय् च्वने मलाः का मखुला, जा मबू केँ मबूगु प्रोग्राम' धकाः हा हां रवि क्वहांवन । क्वहां वनाः चुकय् थ्यंबलय् रविंया मोटर साइकलया हेलमेट लुमन अले चुक हे थ्वय्क कलाःम्हेसित हेलमेट छकः याकनं बी हजि धकाः हालाछ वल ।

तुति स्याःम्ह कलातं ख्वान्त्यां ख्वान्त्यां यानाः हेलमेट बीहल ।

'गवायूत माःगु' धकाः हाहां हेलमेट काल ।

हेलमेटय् धू थानाच्चंगु खनेवं हानं 'हेलमेट छकः हुया हयेम्वःला' धकाः कलाःयातः ह्याउँक मिखा कनाः ज्वयेपिया स्वल ।

आः धाःसा कलाःम्हेसिया तंया पारा हे थहांवल, तर अयूनं वं छुं मधाः रवि कार्यक्रम स्थलय् थ्यन । अन बांबालाःपिं ल्यासेचात नापं बाज्यःवीपिं मिसात नं दुगु जुयाच्चन, मिजंत म्हो जक । रविंयात दबुली सःताः स्वांमालं क्वखाय्काः आशन ग्रहण याकल । त्वाः देवाय् मत च्याकाः उद्घाटन यायेत इनाप यात । मत च्याके धकाः स्वःबलय् अन सलाइ हे मडुगु जुयाच्चन ।

अले तीजक दन, दनाच्चंम्ह

तुलसीलालया न्हाय्पनय् रविं धाल 'मिसातय्गु ज्याला खःनिं, मिजंतय्गु थें गन पक्का जुइ धकाः' । वं खः धैथें छयं भाय् यानाः तुरन्त हे थःगु कोटं लाइटर पिकयाः रविंयात त्वाः देवाय् मत च्याकेबिल ।

आः रविंया न्वचु बीगु पाः वल । उदघोषिका मय्जुं 'थौंया मू वक्ता नारी मुक्ति आन्दोलनया छम्ह सक्रिय अभियन्ता रवि मल्लजुपाखें थौं भीगु पुरुष प्रधान समाजय् मिसातय्सं फयेमाःगु हैकमवाद, अन्या अत्याःया नापं कानुनं प्रत्याभूत यानातःगु नारी हक हित व अधिकारया विषयलय् न्ववानादी, वय्कःया न्वचु सिधयेकाः, छुं नं जिज्ञासा दुसा वय्कःयात न्ह्यसः नं तयेफइ' धकाः उद्घोषण यात ।

तालिं सभा गुञ्जायमान जुल । तर फुक्कस्यां तालि थायेगु दितं नं हूलय् छम्ह मिसां ख्वाः ह्याउँक तयाः थःगु थासं दनाः लापा थानातुं च्वन थानातुं च्वन । फुक्क दर्शकपिनिगु मिखा व मिसापाखे ज्वन । रविं नं सु खः धकाः अन दर्शकतय्गु हूलय् क्वथिक स्वत । वःला मेपिं मखु - थः हे तिरी मय्जु जुयाच्चन । रविंया म्हुतुसि प्यपुन, म्हुतु जक मखु न्ह्यपु तकं गन । वं नवाय् धकाः तयारी यानावःगु फुक्क खँ अन हे दुसुत ।

ने.सं ११४५, चिल्लाथ्व, चौथी, आइतवार (२०८१ फाल्गुण २०)

म्हाइपुगु न्हूदँ



आर. मानन्धर

गपाय्च्चः म्हाइपुगु दिन थ्व ?- कि छाक्क निभाः त्वइ कि धुफ्वः दंक फय् वइ कि प्वे-वाया गाइ ! गर्र्खेसे दिक्कगु मौसमय् नाय्खिं च्वयेकाच्चन सरकारं- लसतां न्हूदँ न्यायेके माः छिमिसं !

जि गथे लय्तायेगु ग्व ? न फय् चंचं धाः न लकस यइपुसे च्वं !

न्हिलेगु गथे ? लसतां प्याखं हुलेगु गथे ? थजाःगु नुगः खुल्ल मिंगु रितुइ उकुमुकु धाःगु प्रकृतिइ ?

थ्व हे चाय् बूपिं, ब्वलीपिं थनया लः-फसय् भेलेपूपिं भूमिपुत्रपिसं थू - थनया प्रत्येक रितुया नुगः ताः - फय्या प्रतिध्वनि तिफ्याइफु - देशया हृदयध्वनि कारुणिक हृदय विदारक शोकाकुल

अले याउँक हालाबी घातु म्ये धाये म्वायेक हुलाबी घातु प्याखं न्यंकाबी प्यखेरं फय्या नुगः खुलुखुलु मिंगु भावना

अय् सरकार, छंगु उजं न्यानाः मनुखं ला न्ह्याःसां म्हाःसां हना बी न्हूदँ छन्हु तर, फय्या उसिमसि, व चाया लुइमखाःगु भाव - स्वस्वखँखं भुलुं च्वंगु सर्गः क्वस्सं भ्रष्टाचारया साःगालय् दुनाः मां प्रकृति व उर्वर पृथ्वीया सभ्यता न्हंकाः केवल शक्तिया दम्भय् छं गथे न्यायेके फत थ्व बेकाइदागु न्हूदँ नखः ?

मनिपर्स



जानीराजा मानन्धर

म्वहःनिया न्हापांगु न्हि । नलस्वां पीत सुथ न्हापनं छ्युंछ्युं धाःगु इलय् दनाः बिष्णुमति फि कया वये धकाः वन सम्यक । लँय् वनाच्चंम्ह वं ढल्कोपाखे चिकिचा ग्वःगु मिस्तयेगु



मनिपर्स छाः बैय् खंकल । क्वछुनाः काल । उखेंथुखें स्वयाः म्हिचाय् स्वथन । बंद फस्नर दुने छु दु धैगु स्वये हथाय् जुल सम्यकया ।

भचा च्वय् थ्यंकाः चायेकाः स्वल । छम्ह मिसाया नांया मास्टर कार्ड व नापं व हे मिसाया नांया सवारि

अनुमति पत्र व छगू बैकया स्टेट्मेण्ट दूगु जुयाच्चन । नां स्वल । किपाः स्वल । अनुमति पत्रय् मोबाइल नम्बर नं खंकल । वं वांछवया बीत्यंगु खः । तर थः हे जात नाप ज्वःलाःम्ह जूगुलिं अथे मयासें म्हिचाय् तुं स्वथन । फि कयाः लिहां वयाच्चंम्ह

सम्यक मनमनं 'जिं थ्व लित बीबलय् तने धुंकाः मेगु दयेकेत वैगु भ्रंभतं मुक्त जुइ व मिसा । जितः गुलि सुवाः बीगु जुइ । थ्व हे सुवाः जिगु म्वहःनि नखःया न्हापांगु द्रहलपा जुइगु जुल ।'

छैय् वल सम्यक । पूजा क्वचायेकाः च्या त्वँत्वँ मिसाया मोबाइल नम्बरय् स्वापू तल मिसा तस्कं हे खुसि जुल । "आः हे नापलाः वये छितः । " " ज्यु, भासँ । " नापलात छथाय् । मिसां हथासं चायेकाः स्वत । म्हुतुं पिदन, "क..... ! थुकी च्वंगु जिगु स्वीनिद्वः तका ग्व ले.....!"

हरेक मंगलवार
राष्ट्रियताको लागि समर्पित



मेरो साप्ताहिक

मेरो साप्ताहिक Mero Saptahik

मालाः मालाः ब्वनादिसँ ।



Sweet Cave

(जीवन दाईया पसः)

Kalimati, Kathmandu, Nepal

Tel: 4275511, 9741112777, 9851063000

यहाँ भोज तथा पार्टीहरूको लागि चाहिने स्पेशल दही, पनिर, लाखामरी, लालमोहन, बर्फी, रसबरी तथा अरु विभिन्न परिकारका मिठाईका लागि सम्पर्क राख्नुहोस् ।

आउटडोर भेज क्याटरिङ्ग पनि गरिन्छ ।

‘नेवाः मिसापिं राजनीतिक रुपं चेतनशील जुइमाः’



लहना वाःपौ/ नेवाः समुदायया मिसापिं भाषा, संस्कृति संरक्षणनाप राजनीतिक रुपं नं न्ह्याः वनेमाः खँय् बः बिउगु दु । १ सय १५ क्वःगु अन्तर्राष्ट्रिय नारी दिवसया लसताय् बोधिचर्या नेपालया ग्वसालय् यल महानगरपालिका-२१ नाप सहकार्य व छ्यूलाबुला ज्यासःया ग्वहालिं नेवाः समुदायया मिसा पिनिगु सशक्तिकरणय् चुनौती व अवसर विषय जुगु छू ज्याइवलय् वक्तापिस उगु खँ धाःगु खः ।

ज्याभूवःया मूपाहाँ वाग्मती प्रदेश सरकारया सामाजिक विकास मन्त्री हरिप्रभा खड्गी श्रेष्ठ व्यवस्था ह्यूपाः हयेगु निति न्हापा थें न्ह्यलुवाः मिसा नेतातय्सं थें आःया मिसापिनिगु स्थिति म्दु धयादिसें राजनीतिक अधिकारया सदुपयोग यायेत मिसापि न्ह्याः वनेमाः खँय् बः बियादिल । सविधानं ब्यूगु मिसा सम्बन्धी अधिकारया अभ्यास यायेमाः धयादिसें वय्कलं धयादिल, ‘संघ, प्रदेश व स्थानीय तहया निर्वाचनय् मिसा पिनिगु उम्मेदवारया ल्याः अप्वयेकेमाः । चुनावया टिकट कायेगु निसे बिइगु, अवसर वल धाःसा ज्या याना क्षमता प्रमाणित यायेगु अधिकार सविधानं ब्यूगु दु । अथेजुयाः मिसापि छैं न पिहां वयेमाः ।’

११५ क्वःगु अन्तर्राष्ट्रिय श्रमिक महिला दिवस

ज्याभूवलय् यल महानगरपालिका- २१ वडाया अध्यक्ष रविन्द्र महर्जनं नेवाः समुदायया राजनीतिक दलय् वने मज्यु धइगु अप्वसिया बिचाः जुगुलिं उकियात हिलेगुमाःगु खँ धासें धयादिल, ‘राजनीति यानाः हे देय्, समाजया अवस्था हिलेगु खः । राजनीति धइगु देय् दयेकेगु निति खः । राजनीतिइ मवनेगु खःसा नेवाः समुदायया सरोकार दुगु ख्यः लिउने लाइ ।’

स्थानीय राजनीतिककर्मी सुप्रभा शाक्यं समाज व राजनीतिक दलय् आःयागु पितृसत्तात्मक बिचाः व संस्कार नापं ल्वानाः हे मिसापिं न्ह्याः वनेमाः धासें धयादिल, ‘पार्टीइ मिसापित टिकट बिलाकि चुनाव त्याइगु व मत्याइगु यक्को शंका याइ । पार्टीपिने बांलापिं स्वयां थः मनूयात थाय् बियाच्चंगु दु । पितृसत्तात्मक बिचाः हावी दु । थुकियात चिइका न्ह्याः वनेगु हे मिसा सशक्तीकरण जुइगु खः ।’

लोकह्वाम्ह गायिका निशा देशारं मिसा शक्तियात थुइका थःपिस सिर्जना कर्मय् न्ह्याः वनेमाः खँ धयादीगु दु । वय्कलं थीथी पंगः चिइका न्ह्याःवने

फत धाःसा मिसापिनिगु जीवनया लक्ष्य पूर्वकेत सूनां नं पने मफइगु बिचाः प्वकादिल ।

हस्तकला उद्यमी सविता सिं महर्जनं मिसापिस थथःगु ख्यलं न्ह्यावन धाःसा यक्व ह्वःताः वइगु बिचाः प्वकादिल । मिसातय्त जुइगु विभेद, पुरातन बिचाः नं मिसापिं न्ह्याः

वनेत थाकूगुलिं उकियात सामना यासे न्ह्याःवनेमाःगु बिचाः नं वय्कलं प्वकादिल ।

बोधिचर्या नेपालया अध्यक्ष अनिल शाक्यं मिसापि शोषित, पीडित जुयाच्चंतले मिर्जपि सुख व शान्तिपूर्वक म्वाय् मफइगु बिचाः प्वकादिल । मिसापिनिगु क्षमता विकास व विभेद क्वचाकेगु निति हे मिर्जपि नापनापं न्ह्या वनेमाःगु खँय् वय्कलं बः बियादिल ।

नेपालभाषाया शिक्षिका गंगा वज्राचार्य स्थानीय तहय् नेपालभाषाया माध्यमं ब्वकेगु नीतिं भाषा, संस्कृतिइ न्ह्यःजाःपि यक्व मिसापित बालागु ह्वःताः वःगु दु धयादिल । ‘मिस नेवाः-११४५’ उपाधिया विजेता प्रलिशा शाक्यं बिना विभेद थःगु लक्ष्यय् न्ह्याः वनेगु व प्रतिभा ब्वयाः आत्मविश्वासपूर्वक न्ह्याः वनेमाः धयादिल खः । बोधिचर्या नेपालया कार्यकारिणी दुजः संगीता शाक्यं मिसापिस छैं दुने जक लिक्ने मजिउगु खँ धयादिल । ज्याइवलय् मिस नेवाः ११४५ उपाधि त्याकूम्ह नाप थीथी उपाधि विजेतातय्त नेवाः परम्परा कथं खँ सगं बिउगु खः ।

इतुंबहालय् खुयायंकूगु ऐतिहासिक स्वपाः पौभाः नेपाः थ्यन

लहना वाःपौ/ थौं स्वयां ३७ दै न्ह्यः यँया इतुंबहालय् खुयायंकूगु ऐतिहासिक महत्वं जाःगु स्वपाः पौभाः नेपाः लितः हःगु दु । अमेरिकाया न्यूयोर्क नेपाः लिहाँ वःपिं विजयमान सिंहलिसैया पुचलं उगु पौभाः ज्वनाः वःगु खः ।

न्यूयोर्कया अदालतय् ताःई मुद्दा जुयाच्चंगु उगु पौभाःयात कयाः अन्ततः नेपाःया हे जूगु ठहर यासें गनयागु पौभाः खः अन हे छ्

वयेगु निर्णय याःगु खः । इतुंबहाः संरक्षण समाजया नायः प्रज्ञारत्न शाक्यं इतुंबहाःया पौभाः नेपाः थ्यंगुलिं लसता प्वकादीगु दु । लिसें वय्कलं थुगु पौभाः नेपाः थ्यंकेगु निति कानूनी प्रक्रियाया ज्या आपालं यायेमाःगु खँ नं कनादिसें थथे खुयायंकूगु पौभाः नेपाः थ्यंसां इतुंबहालय् न्हापा गथे खः अथे हे पौभाः तयेत अफ्न नं ई काइगु खँ धयादीगु दु ।

यँ मनपां ...

शाही फेसबुकय् च्वयातःगु दु, ‘मिहगः जुजुया लसकुसय् भारतया मुख्यमन्त्री योगी आदित्यनाथया किपाः स्वयम् प्रधानमन्त्री केपी ओली ज्यूया निर्देशनय् प्रधानमन्त्री ज्यूया प्रमुख राजनीतिक सल्लाहकार विष्णु रिमालं तयेकूगु लूगु दु । नेपाःया राष्ट्रिय भन्डा सहितया लसकुस ज्याइवःयात लिच्चः लाकेत थज्याःगु कुकर्म यात छि छि ।’

उकथं शाही न्ह्यसः थँसें च्वःगु दु, ‘विदेशी एजेन्डा व सिद्धान्तय् पार्टी चले याइपिसं तःधंगु खँ ल्हाइगु स्वयेबलय् अजूचाः व मार्क्स, लेनिन, माओ गगु देशया खः ?

मिहगः पुलांम्ह जुजुयात लसकुस यायेगु इवलय् भारतीय नेता योगी आदित्यनाथया किपाः छ्यलेवं उकियात कयाः सामाजिक सञ्जालय् आलोचना जुगु खः ।

मेखे एमाले नेता विष्णु रिमालं राप्रपा सचेतक शाही नालायक जूगु टिप्पणी याःगु दु । वय्कलं फेसबुकय् च्वसें थः नालायकत लिसे सवाः जवाः यायेम्हाःगु खँ च्वयादीगु खः । रिमालं डिसइन्फरमेसनया सहाराय् मर्यादित थासय् थ्यपिं अयोग्यपाखे भ्रम न्यंकूगु व शाही भ्रमया बुँज्या याना वयाच्चंगु द्वपं नं बिउगु दु ।

समाजसेवा रत्न ...

सञ्चालनय् यानादीगु योगदानयात कदर यासें सम्मान पौ लःल्हानागु खँ बोधिचर्या नेपालया अध्यक्ष अनिल शाक्यं कनादिल ।

आर्थिकस्तर कमजोर जूपिं वर्ग स्वास्थ्य सेवाय् पहुँच दयेकेत शाक्यं

मिहतगु भूमिका न्ह्यथने बहःजूगु खँ सम्मान पतिइ न्ह्यथनातःगु दु । थ्व स्वयां न्ह्यः थुगु सम्मान संस्कृति शिरोमणी हरिराम जोशी, नेवाः आईडल- ११४३ या विजेता मञ्जित शाक्ययात बिउगु खः ।

फरक क्षमता दुपिं समाज व परिवारं स्वयेगु दृष्टि हिलेगु निति शाक्यं उमिगु दिगो विकास, विस्तार व अपांग मैत्री भवनया अवधारणायात व्यावहारिक कार्यान्वयन याना वयाच्चंगु दु ।

थीथी सामाजिक संघसस्थाय् क्रियाशील शाक्यया हे न्ह्यलुवाय् आः तक ५१ क्वः स्वयां अप्वः निःशुल्क स्वास्थ्य शिविर, कमजोर आर्थिकस्तर दुपिं १ हजार ३ सय स्वयां अप्वः जेष्ठ नागरिक, अपांगता जूपिनिगु निःशुल्क मोतियाबिन्दुया शल्यक्रिया याकादीधुकूगु दु । थुक्रिया लिसें भुखाचं दुंगू सम्पदा पुनःनिर्माणय् नं वय्कः सक्रिय जुयादी ।

सम्मान लःल्हाना कायेगु इवलय् शाक्यं धयादिल, ‘सम्मान समाजसेवाय् न्ह्यानाच्चनेत तिबः बिउगु दु । सामाजिक रुपय् कमजोर वर्गया सेवाया यायेगु मनोबल थकायाबिउगु दु । समाजसेवाय् निरन्तर न्ह्यायेगु प्रतिबद्धता प्वकाच्चना ।’

वय्कलं समाजसेवाय् न्ह्यायेत भाव जक दयां मगाः ध्यबा नं मा । तर, ध्यबा जक फुककं मखु धासें निगूया समिष्ट्रणलिसे ज्याय् पारदर्शी दयेमाः धयादिल । लिसे वय्कलं समाजया अपनत्व नं माःगु व अले जक आत्मविश्वासपूर्वक समाजसेवाय् न्ह्यायेफइगु खँ धयादिल ।

सुनां स्वइ यँ मनपाया घोटाला



लहना वाःपौ/ यँ महागर पालिका मेयर बालेन साहं मखुसें जःखः च्वपिसं सञ्चालन याना वयाच्चंगु द्वपं ताः इलनिसें लानाच्चंगु खः । भ्रष्टाचारया विरोध याना वयाच्चंम्ह साहं धाःसा भ्रष्टाचारीया जःखः च्वनाच्चंगु दु ।

साहं विश्वास यानातःपिनिगु आर्थिक अनियमितता थौकन्हय् चर्चाया विषय जुयाच्चंगु दु । थौकन्हय् छुं हे मजूथाय् लँ स्यंकाः न्ह्यु दयेकेगु लिसें थीथी कथंया ज्याय् महानगरं यानाच्चंगु दु । उकिया नेतृत्व धाःसा मेयर साहया विश्वासपात्र पिसं यानाच्चंगु खँ ये ० महानगरपालिकाया सूत्रं धाःगु दु । ये ० देय्यात बांलाकेगु नामय् गबलें सिमाय् मत तयाः जिल ला, थीथी ज्याइवः याये गु नामय् आपालं भ्रष्टाचार जुयाच्चंगु खँ सूत्रं धाःगु दु । मेयर साहं सञ्चालन याःगु सीप मेलाय् नं आपालं भ्रष्टाचार जुगु खँ सम्बन्धित सूत्रं धाःगु दु । उगु सीप मेला १० करोड तक बजे प्याःगु खःसा तर उगु

ध्यबा गन गन खर्च जुल धइगु तथ्यांक ये ० महानगरपालिकां बिउगु म्दु । उकथं हे सीप मेलां गुलिसित रोजगारी बिल धइगु खँ आः तक न्ह्यसः ब्वलनाच्चंगु दु । ये ० महानगरपालिकां सीप मेला याःगु इलय् प्रतिस्पर्धा मयाकुसें कोटेशनया आधारय् ज्या याकूगु खः । १० करोड तका खर्च जुइगु ज्याय् छाय् टेन्डर मयासें कोटे शनपाखे याकल धइगु गम्भीर न्ह्यसः ब्वलनाच्चंगु दु ।

उकथं हे यँ महानगरपालिकां लाथेपाथे खर्च यानाच्चंगु क्षेत्र धइगु शिक्षा क्षेत्र खः । तर यँ महानगर पालिकां थः मातहतया सामुदायिक विद्यालययात डिजिटल बोर्ड उपलब्ध याकूगु खः । उगु बोर्ड न्यायेगु इवलय् नं टेन्डर मयासें कोटेशनपाखे सामान न्यागुलिं न्ह्यसः ब्वलनाच्चंगु दु । २० लाख तकाया सामान टेन्डर यायेमाःगु खःसा उकियात कुचा थलाः कोटे शन मार्फत न्यागुलिं उकिया लिउने नं घोटाला जूगु अनुमान जुयाच्चंगु दु ।

यँ सुनचाँदी ब्यबसायी संघया नायः शाक्यया अबु मन्त



लहना वाःपौ/यँ सुनचाँदी ब्यबसायी संघया नायः रोहिणा देवी शाक्यया अबु सूर्यरत्न शाक्य ८९ दँय् मन्त ।

वयकः वासः यायेगु इवलय् केएमसी अस्तलालय् मरुगु खः । वय् कःया अन्तिम संस्कार शोभा भगवती कर्णदीपय् याःगु खः ।

मदुम्ह शाक्य राष्ट्रिय सहकारी महासंघया पुलाम्ह महाप्रबन्धक व केन्द्रीय सहकारी प्रशिक्षण केन्द्रया पुलांम्ह प्राचार्य लिसें सहकारी अभियानय् समर्पित जुयादिम्ह खः ।

रञ्जना लिपिं पिहाँ वयाच्चंगु रञ्जना लय्पौ ब्वनादिसँ/ब्वकादिसँ

रञ्जना लिपि

रञ्जना लिपि

प्रचलित नेपाललिपिं पिहाँ वयाच्चंगु म्हसीका लय्पौ ब्वनादिसँ/ब्वकादिसँ

ममीका लय्पौ

ममीका लय्पौ

लुम्बिनीइ प्यक्वःगु अन्तर्राष्ट्रिय त्रिपिटक वाचन



लहना वाःपौ/ लुम्बिनीइ प्यक्वःगु अन्तर्राष्ट्रिय त्रिपिटक वाचन वंगु बुधवाः उलेज्या जूगु दु। उपप्रधान लिसे शहरी विकास मन्त्री

प्रकाशमान सिंह छगू ज्याभूवः दथुइ त्रिपिटक (पाठ) या उलेज्या यानादीगु खः। अखिल नेपाल भिक्षु महासंघया ग्वसालय् व लुम्बिनी विकास कोषनाप

थीथी संस्थाया ग्वहालि लुम्बिनीस्थित मायादेवी द्यःया थाय् त्रिपिटक वाचन सुरू जूगु खः। उपप्रधान शहरी विकास मन्त्री प्रकाशमान सिंह हलियक जुयाच्चंगु अस्थिरताया संकेत खनेदुगु अवस्थाय् बुद्धया शिक्षां शान्ति कायम यायेफइगु बिचाः प्वकादिल।

वयकलं बुद्धया शिक्षायात पुर्नताजगी याना त्रिपिटक पाठ हलिन्यक च्विपंत लुम्बिनीपाखे शान्ति सन्देश वनिइ खँ धयादिल। ज्याभूवल्य लुम्बिनी विकास कोषया उपाध्यक्ष डा.लहारक्याल लामा, संघनायक नेपालया भिक्षु बोधिसेन महास्थविरापिस थःथःगु बिचाः प्वकादीगु खः।

हल्चोकया १२ दँया जात्राया नितिं ११५ म्हेसिया मूल समारोह समिति



लहना वाःपौ/वइगु ११५ म्हेसिया समिति स्वंगु खः। बैशाख १ गतेनिसें न्ह्याइगु श्री हल्चोक आकाशभैरवया भिनिदँया जात्रा सुर्थांलाक्क न्ह्याकेगु नितिं ११५ म्हेसिया मूल समारोह समिति स्वनेज्या याःगु दु। श्री हल्चोक आकाश भैरव समाजया नायः शेरबहादुर पुतवारया नायःसुइ थ्वहे फागुन २३ गते शुक्रवाः च्वंगु मुँज्यां थुकथं

हलिं नेवाः गुथिया नेतृत्वय् सुरेश सैजु

लहना वाःपौ/हलिं नेवाः गुथिया भिंखुक्वःगु दँमुँज्या व च्याक्वःगु तःमुँज्यां सुरेश सैजुया नेतृत्वय् न्हूगु ज्यासना पुचः ल्यःगु दु।

थनया भ्रमकेश्वरी प्रांगणय् थ्वहे चिल्लाथ्व नवमि (फागुन २४) स जूगु गुथिया तःमुँज्यां सैजुया नेतृत्वय् सर्वसम्मत न्हूगु ज्यासना पुचः ल्यज्या जूगु ल्यज्या कवःया काँज अधिवक्ता नरेश श्रेष्ठ घोषणा यानादीगु खः। सर्वसम्मत जूगु न्हूगु ज्यासना पुचःया न्वकुइ अमरकाजी श्रेष्ठ, मूल्याज्जे धर्मनारायण महर्जन व दांभरि सूर्यलक्ष्मी महर्जन ल्यःगु दु।

शुकथं हे दुजलय् सुवर्ण मानन्धर, डा. रसिला अमात्य, तुल्सीनारायण श्रेष्ठ, रामकृष्ण महर्जन, दीपक मुल्मी, विष्णु कर्माचार्य व ममता शाक्य ल्यःगु खः।

न्हूगु ज्यासना पुचःया नितिं वंगु चिल्लाथ्व षष्ठी (फागुन २१) गते बुधवाः जन चिकित्सालय न्ह्योखाय् जूगु कचा नायः, केन्द्रीय प्रतिनिधि व कचापाखें भ्नाःपिं पार्षदपिसं सर्वसम्मतकथं न्हूगु ज्यासना पुचः



ल्यःगु खः।

निर्वाचित जूगु न्हूगु ज्यासना पुचःया घोषणा जुइ न्ह्यः गुथिया मूनायः विनोद महर्जनया नायःसुइ तःमुँज्याया उलेज्याइवः न्ह्याःगु खः।

दक्षिणकाली नगरपालिकाया मेयर मोहन बस्नेतया मूपाहाँसुइ जूगु ज्याइवल्य नुगःखँ तयादिसं वय् कलं दक्षिणकाली नेवाः, तामाङ्ग, खय्, ब्रम्हू सकसियां बस्ती दुगुलिं थनया सांस्कृतिक सन्तुलन यानाः थः न्ह्यज्यानाच्चनागु खँ तयादीगु खः। वय्कलं दक्षिणकालीया मू म्हेसीका जुयाच्चंगु थीथी जात्रापर्वत नेवाःतय्सं

हे न्ह्याका वयाच्चंगु खँ कुलादिसं नेपाःया संस्कृतितात ल्यंकेगु नितिं नेवाःतय्सं म्हितावयाच्चंगु भूमिकायात लुमकादिल।

नेवाः भासं हे ज्याइवल्य नुगःखँ तयेगु इवल्य वय्कलं गुगुं न संगठन बांलाकेत थवंथवय् सहलह ब्याकाः न्ह्याः वन धाःसा जक बल्लाइ धयादिल। शुकथं हे वय्कलं थौकन्हय् देसय् छम्ह व्यक्ति न्ह्यःने तयाः न्ह्यात धाःसा बांलाइगु बिचाः वयाच्चंगु तर अथे मखसं भीपि मिले जुयाः हे जक देय्या विकास सम्भव जुइगु बिचाः तयादिल।

जैविक विविधताको संरक्षण गरौं

- वनजङ्गलको संरक्षण र वृक्षारोपणका कार्यक्रम संचालन गरौं,
- जलाधार क्षेत्र र सिमसार क्षेत्रको संरक्षणमा जुटौं,
- दुर्लभ वनस्पति तथा पशुपक्षीको अवैध सिकार र तस्करीविरुद्ध आवाज उठाऔं,
- वातावरणीय सन्तुलन कायम हुने गरी विकासको कार्यक्रम संचालन गरौं,
- परम्परागत कृषि बाली र पशु नश्लको संरक्षण गरौं।

जैविक विविधताको संरक्षण बारेमा जनचेतना जगाऔं।



नेपाल सरकार

विज्ञापन बोर्ड

छत्रपाटी निःशुल्क चिकित्सालय (अस्पताल)

“सुदृढ शलभ स्वास्थ्य सेवा सकसियां नितिं, असहायता नितिं जक निःशुल्क”

उपलब्ध सेवा

२४सै घण्टा सेवा

- ईमरजेन्सी
- प्याथोलोजी
- एक्स रे
- ई.सी.जी
- औषधि पसल
- अन्तरंग सेवा

शल्यक्रिया

- मोतिबिन्दु
- ज्वरत त्वरी
- नाक बान घाँटी सम्बन्धि
- हाडजोर्नी तथा नसा सम्बन्धि
- शिवा विरकार पिशाच मसीको पत्थर सम्बन्धि

बहिरङ्ग सेवा

- मुटु रोग
- पेट रोग
- यूरोलोजी
- स्त्री रोग
- बाल रोग
- कवाल्बर रोग
- दन्त रोग
- आँखा रोग
- जनरल मेडिसिन
- धनं तथा यौन रोग
- नाक बान घाँटी रोग
- जनरल हेल्थ चेक अप
- बाइरोइड
- मधुमेह

मेमेम् सेवा

- ड्रेसिङ
- इण्डोस्कोपी
- कोलोनोस्कोपी
- फिजियोथेरापी
- अल्ट्रासाउण्ड, क्लर इलर र इको
- यूरोलोजी लरको दन्त प्रयोगशाला
- टिएम.टी. हल्टर

२४ घण्टा ईमरजेन्सी सेवा

७०८ गंगालाल मार्ग, छत्रपाटी, काठमाडौं, फोन: ५३१६१३८, ५३५७९११, ५३६६२२९